

Ai 26 di dicembar
S. STIEFIN, PROTOMARTAR

Antifone di jentrade

Si son spalancadis denant di san Stiefin lis puartis dal cîl
e lui si è cjatât par prin te schirie dai martars
e cussi al trionfe in cîl coronât di glorie.

Si dîs Glorie a Diu.

Colete

A nô, ch'o celebrin, Signôr,
la nassite di chel ch'al à savût preâ ancje pai siei persecutôrs,
danus la gracie di imitâ chel ch'o stin onorant
e di imparâ a volêur ben ancje ai nestris nemîs.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETURE At 6,8-10; 7,54-60

O viôt i cîi spalancâts.

Dai Ats dai Apuestui

In chei dîs, Stiefin, incolm di gracie e di virtût, al faseve meracui e spiëi di chei grancj framieç dal popul. Alore un trop de sinagoghe, che ur disevin dai "sfrancjâts", int di Cirene, di Alessandrie e altris de Cilicie e de Asie si meterin di mieç e a scomençarin a contindi cun Stiefin. Ma no rivarin adore di tignîi teste a la sapience e al Spirit che lu faseve fevelâ.

Sintintlu, ur vignive sù la rabie e a crustavin i dincj cuintrî di Stiefin.

Plen di Spiritu Sant, lui al cjalà sù fis viers il cîl e al viodè la glorie di Diu e Gjesù in pîts a la sô gjestre. Alore al disè: «O viôt i cîi spalancâts e il Fi dal om in pîts a la gjestre di Diu». Petant grancj berlis, si stroparin lis orelis e si butarin intor di lui; lu sburtarin fûr de citât e si meterin a clapadâlu. I testimonis a poiarin i lôr vistîts dapît di un zovin di non Saul. E intant che lu claponavin, Stiefin al preave cussi: «Signôr Gjesù, cjom la mî anime». Po si pleà sui zenôi e al disè a fuart: «Signôr, no sta metiur in cont chest pecjât». E cun chestis peraulis, si indurmidì vie.

Peraule di Diu.

SALM RESPONSORIÂL dal Salm 30

R. Signôr Gjesù, cjom la mî anime.

Slungje viers di me la tô orele:

anìn svelt a liberâmi;

viôt di jessi par me une crete che mi pare,
un ripâr là che nissun nol rive a cjapâmi. **R.**

Tes tôs mans o met la mî vite;

sfrancjimi, Signôr, Diu di peraule.

No vuei viodi chei ch'a corin daûr di dius che no son nuie,

jo tal Signôr o ai metude la mî fede.

O vuei gjoldi ejtant il to boncûr. **R.**

Fâs lusî la tô muse sul to famei;

salvimi pal to boncûr.

Tu mi platis a l'ombre de tô muse,

lontan des palissis dai umign. **R.**

SECONDE LETURE Rm 5,1-5

Si vantin parfîn tes tribulazions.

De letare di san Pauli apuestul ai Romans

Fradis, justificâts pe fede o sin in pâs cun Diu midiant dal nestri Signôr Gjesù Crist. Midiant di lui o vin vude ancje la jentrade, pe fede, in cheste gracie che si cjatin e si vantin te sperance de glorie di Diu. No dome, ma si vantin parfin des tribulazions, savint che la tribulazion e fâs nassi la pazience, la pazience une virtût provade, la virtût provade la sperance. E la sperance no lasse malapaiâts, pal fat che l'amôr di Diu al è stât strucjât tai nestris cûrs in fuarce dal Spirtu Sant che nus è stât dât.

Peraule di Diu.

Secuence

HANC CONCORDI

Celebrin cheste fieste cun devozion e concuardie
sul esempi di chel ch'al à perdonât a di chei che lu perseguitavin.

Stiefin, puartebandiere dal grant re, scoltinus,
tu che tu âs zovât e tu sêts stât scoltât ancje pai tiei nemîs.

Pauli, ch'al jere un to persecutôr, in gracie des tôs preieris al à crodût in Crist
e cumò al gjolt cun te in chel ream che nissun persecutôr al pues svicinâsi.

Ancje nô ti prein e ti suplichin:
la tô preiere cussi sante che nus meti simpri in buinis cul nestri Diu.

Pieri ti à sielzût come servidôr di Crist
e tu a Pieri tu i âs mostrât il mût che si à di crodi.

Mostrant a la gjestre dal Pari chel che la fole insuride e veve metût in crôs,
Crist ti à sielzût par sè, Stiefin,
e midiant di te al rinfuartîs chei che a crodin in lui.

Framieç dai claps che ti rodolavin di ogni bande,
si è palesât a ti par confuartâti.

Cumò tu lysis cu la tô corone
framieç des schiriis purpureis dai martars.

CJANT AL VANZELI cf. Sal 117,26.27

R. Aleluia, aleluia.

Benedet chel ch'al ven tal non dal Signôr;
e splent sore di vualtris la lûs de sô muse.

R. Aleluia.

VANZELI Mt 10,17-22

No sêts vualtris che o fevelais, ma il Spirt dal Pari vuestri.

Dal vanzeli seont Matieu

In chê volte, Gjesù al disè ai siei dissepui: «Stait vuardâts dai oms: us consegnaran ai sinedris e us flagjelaran tes lôr sinagoghis; o sarêts strissinâts denant dai governadôrs e dai rês par colpe mê, par ch'o dedis testemoneance a lôr e ai paians. Se us consegnaran tes lôr mans, no stait a bacilâ di cemût o di ce che o vêts di dî. Us sarà ispirât in chel moment ce che o varêts di dî; parcè che no sêts vualtris ch'o fevelais, ma il Spirt dal Pari vuestri al fevelarà in vualtris.

Il fradi al consegnarà a muart il fradi, e il pari il propri fi; i fis a jevaran sù cuintri dai gjenitôrs e ju fasaran murî. O sarêts odeâts di ducj par colpe dal gno non. Chel ch'al varà tignût dûr fin tal ultin, chel si salvarà».

Peraule dal Signôr.

Su lis ufiertis

Acete, Signôr, i regâi che vuê ti ufrin

come segnâl de nestre devozion
par onorâ la memorie gloriose
dal sant martar Stiefin.
Par Crist nestri Signôr.

Antifone a la comunioñ At 7,59

Instant che lu claponavin, Stiefin al preave e al diseve cussì:
Signôr Gjesù, cjal la mê anime.

Daspò de comunioñ

Ti vin agrât, Signôr,
pai tancj segnâi dal to boncûr par nô,
tu che tu nus salvis cu la nativitat di to Fi
e tu nus fasis gjoldi cu la celebrazion dal sant martar Stiefin.
Par Crist nestri Signôr.